



Inatsisartuni ilaasortaq Hans Enoksen, Partii Naleraq
/maani

Nuugaatsiaq aamma Illorsuit pillugit § 37 naapertorlugu apeqquteqaammut 2019-183-imut akissut

03-06-2019
Suliaq nr.: 2019 - 11470
Id nr. 41780956

Asasara Hans Enoksen

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

Inatsisartut suleriaasianni § 37 naapertorlugu Nuugaatsiaq aamma Illorsuit pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Apeqqut 1: Nuugaatsiami aamma Illorsuarni tassaarsuup siornatigut inuit aqqisa allattorsimaffiani qassit Nuugaatsiami Illorsuarnilu najugaqarlutik allattorsimaffimmiippat?

Akissut: Avannaata Kommuniarit ilisimatitsissutigineqarpoq, tassaarsuaq sioqqutitsiarlugu inuit nalunaarsorsimaffianni paasissutissat malillugit Nuugaatsiami inoqutigiit 41-t, tassalu innuttaasut 101-it nalunaarsorsimasut aammalu Illorsuarni inoqutigiit 31-t, tassalu innuttaasut 77-it nalunaarsorsimallutik.

Apeqqut 2: Nuugaatsiarmit aamma Illorsuarmit nuutsitaasut qassit namminneq nuutsitaaffigisaminnut namminneerlutik illoqareerlutik nalunaarsorneqarsimappat?

Akissut: Inoqutigiit arfineq marluk, Nuugaatsiap aamma Illorsuit avataanni illunik pigisaqartut nalunaarsorsimapput. Taakkunanngali pingasut ajunaarnersuaq pimmat Illorsuarni aamma Nuugaatsiami attartortuupput, taamaattumillu taarsiiffigineqarnissamut pisinnaatitaaffeqaratik.

Apeqqut 3: Nuugaatsiarmit aamma Illorsuarmit namminneerlutik inissianik pigisaqartut qassit 50.000,00 koruuninik taarsiivigineqarpat?

Akissut: Inoqutigiit taarsiissutissanik pissarsinissamut pisinnaatitaaffeqartut sisamaapput. Taakkunanga pingasut akuersipput, ataaserli taarsiiffigineqarnissaminut itigartitsivoq.

Apeqqut 4: Qassit Nuugaatsiami aamma Illorsuarni najugallit tassaarsuup nalaani pineqartuni najugaqarsimasut illussaminnik taarsiivigineqarpat?

Akissut: Inoqutigiit 34-t Nuugaatsiami imaluunniit Illorsuarni inissiamik pigisaqarnerminnik uppernarsaasinnaasimapput. Sinneri inissiamik attartortittakkamik neqeroorfigineqarput.

Apeqqu 5: Inoqutigiit qassit Uummannap Upernaviullu avataanut illoqarfinnut anginerusunut allanut inissaminik attartortussanngorlugit neqeroorfigineqarpat?

Akissut: Inoqutigiit marluk Aasianni aamma Ilulissani inissiamik attartortittakkamik neqeroorfigineqarput. Ilinniartut marluk Nuummi inissiamik attartortittakkamik kissaateqarsimagaluarput – taakkuli isummatik allanngortillugit Uummannamut uterusussimapput.

Apeqqu 6: Naalackersuisut siulittaasuata Nuugaatsiarmit aamma Illorsuaq-miut, Nuugaatsiamiit Illorsuaq-miillu nuutsitaammata neriorsuisimavoq initaarnissamik tungaannut akilersuisinneqassanngitsut, neriorsuut sulii Naalackersuisut siulittaasuata attappaa?

Akissut: Isumaginninnermut Inatsisinillu Atuutsitsinnermut Naalackersuisoqarfik, Aningaasaqarnermut Naalackersuisoqarfik kiisalu Naalackersuisut Siulittaasuata Naalackersuisoqarfia ilisimatitsipput, ikiorsiinissamut inatsisitigut tunngavigineqartoq, Pisortanit ikiorsiissutit pillugit Inatsisartut peqqussutaanni nr. 15-imi, 20. november 2006-imeersumi nassaarineqarsinnaasoq. Tamatuma saniatigut Aningaasaqarnermut Akileraartarnermullu Ataatsimiititaliaq inatsisitigut tunngavissamik immikkut ittumik pilersitsivoq, tassalu konto pingaarneq 20.10.32 Uummannaq eqqaani ajunaarnersuarmut tunngatillugu immikkut ittumik iliuuseqarnissat, innuttaasunut ajunaarnersuarmut toqqaannartumik eqqugaasunut immikkut ittumik ikiorsiissuteqarnermut atugassamik. Taanna tunngavigalugu ilaatigut ineqarnermut akiliutinut ikiorsiisoqarsinnaalerpoq.

Innuttaasoq inissiiviugallartumut inissinneqarsimappat, aammalu innuttaasup sulini ilinniarniniluunniit aallarteqqissinnaalerpagu, taamaattumillu tassanngaannartumik ikiorsiinissaq pisariaqarunnaarpat ineqarnermut akiliutinut akiliunneqarnissamut tunngavissaq atorunnaassaaq.

Apeqqu 7: Nuugaatsiarmit aamma Illorsuarmit tassaarsuarmik eqqugaasut aamma piffinni taakkunani tassaasuup siornatigut inuit aqqisa allattorsimaffiani allattoqqasut qassit illussaannik tunineqanngillat sooq?

Akissut: Tassaarsuup siunitsianngua inuit nalunaarsorsimaffianni nalunaarsorneqarsimasut aammalu Illorsuit Nuugaatsiallu avataanni inissinnissamut periarfissaqanngitsut tamarmik inissiamik taartissamik imaluunniit inissiamik attartugassamik neqeroorfigineqarsimapput.

Avannaata Kommunianni ilisimatitsissutigineqarpoq, Uummannami ineqarnermi pissutsit peqqutaallutik ilaqutariit ilaat, inoqutigiinnut ataatsinut ilaagaluartut inissianut arlalinnut neqeroorfigineqartariaqartarsimasut.

**Apeqquut 8: Illunik tunineqartussat illuminnut akilersuissappat imaluunniit
ajunaarnermik eqqorneqarsimasut illumik tunineqaannassappat?**

Akissut: Nuugaatsiami Illorsuarnilu innuttaasut tamarmik inissianik imminnut
pilorsorsinnaangikkunik ineqarnermut akiliisussaapput. Aammattaaq apeqquut 6-imut
akissut takuuk.

Innuttaasut, tunngavissat Naalakkersuisunit akuerineqartut tunngavigalugit inissiamik
taartissamik tunineqarnissamut pisinnaatitaaffeqartut inissiamik taartissamik
neriorsuiffigineqarput. Inissiat taartissat 2019-imi oktobarimi iserterfigineqarnissamut
piareernissaat naatsorsuutigineqarpoq.

Neriuppunga qulaani allaqqasuni apeqquuteqaatitit akineqartut.

Inussiarnersumik inuulluaqqusillunga


Karl Frederik Danielsen